



- E cumò, di ce bande? Al domande Franc, cuant ch'a rivin li de beorcje che si vierç in trê direzions.

Marc nancje nol rispuint, dome al si invie bande çampe.

- Par di là? Vîno di zirâ bande di là?

Marc al va di lunc a cjaminâ dret, cidin, al sa ben lui ce che i baline intal cjâf!

Franc al scomence a stufâsi. Al à acetât di lâ cun Marc, che al veve tant insistût, ven, o lin fin li, fin là vie, no stin tant, no, nuie, o ai voie di fâti viodi une robe, a son cuatri pas, e dai, mo, sù, no stin tant...

- Alore o lin li de sagre? Lino li de sagre? Ma la sagre e je finude, a varan ancje disfat dut, cumò, metût vie.

E chel altri saldo mutul.

- O sint, mo! O soi stufât, o soi vignût cun te, dome par fâti un plasê, no tu mi as nancje dit ce robe che o vin di viodi, jo o torni indaûr...

- Cjale là. O sin rivâts.

Il braç di Marc, cumò, al mostre alc.

- Beh? Ce aio di cjalâ? Al è un arbul, veh, un tei! E alore?

- O jerin sentâts li sot. La sere de sagra, domenie. Al jere un taulin, li.

- E ben?

- Linde e jere cun me. E tu jeris ancje tu.

- Sì, jo, o jeri, sì. E alore? A jerin ancje di altris, se al è par chel.

- Ma tu le as menade a cjase tu.

- Sì, jo. Tu tu jeris lât vie.

- Sâstu a ce ore che o ai di jevâ jo? Ogni dì, fur che la domenie?

- Ah.... no sai... a buinore.

- A buinore trop?

- No sai... a cinc?

- A trê. Cumò astu capît parcè che o soi lât vie prime de tombule? Almancul un trê, cuatri oris o scugnarai durmîlis. O no?

- Sì, ma ce jentrio jo?

- Ti plasie Linde, a ti?

- Ma ce...

- Ti plasie o no?

- Ma...

- Ti plâs. Par chel o vin di decidi, cumò.

- Decidi ce?

- Se e à di sei mê o tô.

- Ma ce distu? Ce ti saltie sù?

Il prim pugn i rive inte gramule, cence che al vei vût il timp nancje di viodi di dulà che al jere partît.

- O tu o jo! - e jù un altri.

- Ma tu tu sês mat!

Daspò dal tierç pugn, ancje Marc al scomence a cerça une pidade sul vues rabiôs, uhi, ahi! E alore sì, che e ven bieles! Sberlotis, pugns, sgarnofs, pidadons, patafs, pachis... trop ise

durade? E cui le aie vude vinte?

Cui savê!

Un an e mieç daspò di chê pestadice, une domenie di matine, in paîs, a sunin di fieste lis cjampanis. Batisins. Linde, dute ridinte, i stampe une bussadone sul smursiel a la sô frutine, prime di poiâle intal braç de santule.

I samee dute a Franc, ma ce distu? Cjale il music, no isal chel di Marc? Ma no! i voi a son di Franc, sì, ma il cerneli... no, ma il nasut, no viodistu, cu la ponte in sù tant che Marc! Ma dulà vêso i voi vualtris! E je dute Franc! No, po e je spudade Marc.

Insome, un misteri! Par disgrupâlu i volares cualchidun che al jere lì de sagre in chê volte de pestadice.

Ma jo no jeri, o jeri a cjase. A scrivi cheste conte.

Curte.

di Laurin Zuan Nardin

